



Sabtu, 17 Juli 2021
Ogen: Pengerana 7:11-12



Pemeteh Eme Barang Pusak



I bas PA Moria, sekalak Moria nuriken penggejapenna, sekali jadi ngerana me anakna sintengah man bana nina : *Nande la padah latih kal akapndu ngukurisa kerna taneh tinading siman tadingenkendu pagi man kami. Kami enggo sekolahkenndu, enggo kuliahkenndu, janah enggo melala dat kami pemete. Sie kerina ergan asangkan taneh tinading sebab taneh banci keru terdaya, tapi pemete la banci terdaya janah ngerehken erta man kegeluhen kami pagin. Megi rana e sengget morie e, janah nina bas ukurna : payo kap nina anakku e.*

Senina moria, kitab Pengerana 7:11-12 nekanken maka ngeluh arus pentar/erpemete. Isaksiken maka pemete e seh kel ergana; bali ras barang pusaka. Barang pusaka e meherga, jadi sada perayaken geluh. Sindatken barang pusaka; ndatken kinihagan, kemalimen ate ras ulih si mehuli. Erdandanken si e enterem kalak rusaha keras, dengen nggit erkorban segelah ndatken barang pusaka. Bagenda me nilai pemete e ergana. Nina Mahatma Gandhi "*hiduplah seolah engkau mati besok, belajarlah seolah engkau hidup selamanya.* Si enda ngatakenca maka pemete e ngeluh seh rasa lalap, e maka erlajarlah terus. Bagenda me arusna kita ndarami pemete, sabab kalak si ndarami pemete ndatken kepentaren, ngaloken ketenengen dengen keterkelinen. La kin enda me barang pusaka kegeluhen si la banci itangko kalak entah terdaya bagi kesaksin moriata i bas er PA ndai. Senina moria anak-anakta mulai masuk sekolah, mari babai ia ngidah ergana pemete e segelah ergiah-giah ukurna guna ndatken pemete. Guna si e lit telu si arus si man dalanken kita ras anakta eme *comitmend, consistend dan continiu (3 C)*. *Ertekad kita guna ndatkenca, konsisten i bas tekad sienggo sibahan ndai dengen terus menerus silakoken si e. Silakoken 3 C enda sialoken me barang pusaka e.*

